



**SCOLA
LUMNEZIA**

351.10

Reglament davart l'instrucziun da sport speciala e gis da sport

dils 01 da settember 2016 (stan 01-09-2016), vers. 1.1

(stan 01-08-2020), vers. 1.4

<i>Decisiun</i>	<i>vigur</i>	<i>versiun.</i>	<i>midada</i>
01.09.16	01.09.2016	1.1	niev
01.06.17	21.08.2017	1.2	rev.
24.09.19	24.09.2019	1.3	rev.
15.04.21	01.08.2020	1.4	rev.



Reglament davart l'instrucziun da sport speciala e gis da sport

Relaschaus dil Cussegl da scola, ils 01-09-2016.

Las indicaziuns da persunas, funcziuns e professiuns serefereschon ad omisduas schlatteinas, aschi lunsch ch'ei seresulta buca enzatgei auter ord il senn da quest reglament.

I. General

Art. 1. Intent e finamira

1. Mintga scolar duei vegnir promovius da semover e far sport. Sper il sport en halla da gimnastica e sil plaz da sport duein era auters sports vegnir promovì.
2. Il sport da skis duei vegnir promovius specialmein demai ch'el s'auda tier la tradiziun da nossa val.
3. Mintga affon duei haver la pusseivladad d'emprender da senudar.
4. La planisaziun annuala d'occurrentzas da scola duei cumpigliar sil pli pauc in'occurrentza sportiva sper l'instrucziun da sport ordinaria.
5. Occurrentzas da sport duein era cuntener finamiras socialas, sco promoziun dil spert da team, fairness e setener vid reglas.

Art. 2. Relaschar directivas

1. La direcziun da scola sa relaschar ina directiva tier quest reglament.

Art. 3. Diever dil handy ed autras apparaturas electronicas

1. Il diever dil handy ed autras apparaturas electronicas per ils scolars vegn reglaus dallas PI pertuccadas risguardont igl uorden da scola ed igl uorden disciplinar.

Art. 4. Scolars blessai e reconvalescents

1. Scolars che san ord motivs da sanadad buca separticipar all'occurrentza da sport van a scola. Igl ei era pusseivel d'occupar els en connex cull'occurrentza. L'organisaziun succeda entras la PI da classa.

Art. 5. Persunal d'instrucziun

1. Las PI sorprendan incaricas tenor il carnet da duers vertent.
2. Il MS ha la pusseivladad d'incaricar PI cun in pensum special en connex cun gis da sport specials ed occurrentzas da sport.

Art. 6. Transports

1. Ils transports vegnan fatgs culs mieds publics ni cun viadis specials. Transports cun mieds privats ein da principi buca lubi. Davart excepziuns decida il MS.

Art. 7. Contonschibladad

1. Las PI responsablas ein conontschiblas sil handy durant activitads el liber.



II. Sport d'unviern

Art. 8. Jamna da scola da skis per la scoletta

1. Tut ils scolarets frequentan ina jamna (6 mezs gis) da scola da skis cun personal qualificau. Per terminar la jamna ha per ordinari liug ina cuorsa.
2. Duront la jamna da scola da skis croda l'instrucziun ordinaria.

Art. 9. Ir cun skis

1. Mintga partizien dalla scola primara duei passentar 4 – 6 mezs gis cun skis, quei sper il gi d'unviern.
2. Pils scolars dalla 1. – 4. classa primara vegn organisau 2 entirs gis in vid l'auter instrucziun da skis cun scolasts patentai (09.00 – 15.30 uras). Ils gis da skis han liug era sche la classa havess mo avonmiezgi scola. Suentermiezgis libers vegnan buca cumpensai. La survegionza da miezgi sorprendan las personas d'instrucziun da classa. L'instrucziun en scola croda diltuttatfatg quels gis.
3. Ils scolars dalla 5. e 9. classa san ir cun skis en gruppas.
4. Il scalem superiur organisescha sil pli pauc 3 gis da skis ordinaris.

Art. 10. Retuorn a casa cun skis

1. Cul consentiment dils geniturs han ils scolars dalla 5. classa e pli vegls la pussevliadad da returnar a casa cun skis, denton mo sin ina pista controllada.
2. La scola stippulescha las cundiziuns corrispudentas en ina cunvegnientscha culs geniturs. Ei setracta primarmein dils suandonts puncts:
 - a) responsabladad
 - b) pista controllada
 - c) obligaziun d'annunzia
 - d) resalva entras la persuna d'instrucziun
3. La scola resalva la libertad da scumandar a moda spontana il retuorn cun skis e quei senza segiustificar enviers ils geniturs. (ex. per scamonds spontans: midada dall'aura ni relaziuns, etc.)
4. La scola sclauda scadina responsabladad e la pussevliadad da regress. Medemamein sa ni il personal da scola ni l'organisaziun vegnir inculpai.
5. Ils geniturs ein responsabels dad annunziar il retuorn da lur affons immediatamein alla persuna d'instrucziun responsabla.

Art. 11. Affons che san buca ir cun skis

1. Per affons che san buca ir cun skis vegn organisau unitads da scola da skis.

Art. 12. Gis d'unviern

1. Il scalem superiur organisescha in gi d'unviern cun differentas purschidas. Igl intent ei d'animar ils scolars d'empruar ora differents sports d'unviern.
2. Il scalem primar organisescha in'occurrentza d'unviern d'in gi. Quel duei cumpigliar ina concurrenza per tuts sco era divertiment e plascher da semover ella neiv.



Art. 13. Segirtad e cuors da lavinas

1. Ils scolars san co agir en cass d'urgenza. Las numeras da telefon necessarias ein enconuschentas.
2. Mintga 2-3 onns duei vegnir organisau per il scalem superiur in gi da scolaziun co secuntener sin pista, sper la pista en cumbinaziun cun in cuors da lavinas.

III. Sport da stad

Art. 14. Gi da sport tradiziunal

1. L'organisaziun dil gi da sport d'atun tradiziunal vegn fatgs en collaboraziun cun l'uniun sportiva Lumnezia. La persuna da contact cull'uniun sportiva ei il MS.
2. Il gi da sport secumpona dad ina concurrenza en differentas disciplinas d'atletica leva ed ina part nua ch'il moviment senza concurrenza stat el center.
3. Il gi ha liug in vendergis igl atun, cuoza naven dil suentermiezgi tochen la sera e vegn cumpensaus cun in entir gi da scola. Ei dat negin datum da stuschada.

Art. 15. Gi primavaun

1. La scola primara organisescha annualmein in gi da moviment primavaun. Il program vegn definius dil team scolastic.

Art. 16. Gi da sport e savida

1. Il scalem superiur organisescha in'occurrentza dad in gi che secumpona da treis parts. Ina part sportiva, ina part da savida ed ina part divertenta.

IV. Instrucziun da senudar

Art. 17. Organisaziun e persuna d'instrucziun

1. Per l'instrucziun da senudar ei la PI ch'instruescha sport responsabla. Las directivas cantunalas e las directivas SLRG ein ligiontas.
2. PI ch'instrueschan sport ein denton buca el possess d'in brevet correspondent, procuran per ina persuna ch'ei legitimada d'instruir. En emprema linga ein quei PI da nossa scola.
3. Ein las gruppas memia grondas ni drova la PI sustegn supplementar, sa vegnir engaschau ina persuna supplementara per l'instrucziun ni sulettamein per la survigilanza.
4. Ei dat la pussevividad d'engaschar ina scolasta da senudar diplomada sch'igl ei buca pusseivel da porscher l'instrucziun cun PI internas.

Art. 18. Instrucziun da senudar en scoletta

1. Ils scolarets frequentan in cuors intensiv d'emprender da senudar (5 mezs gis in vid l'auter). Alternativ sa era in cuors da senudar sur pliras jamna cun mintgamai 1-2 unitads jamnilas vegnir purschius, quei minimalmein 5 tochen maximalmein 8 unitads.

Art. 19. Instrucziun da senudar scalem primar

1. Ils scolars frequentan sil pli pauc 3 denton max. 8 unitads da senudar.



Art. 20. Instrucziun da senudar scalem superiur

1. Las partiziuns dil scalem superiur frequentan mintg'onn da scola 3 unitads da senudar.

Art. 21. Auters sports

1. Sin damonda alla direcziun da scola sa era vegnir fatg auters sports.
2. Sports da risico ein scumandai.

V. Cuosts

Art. 22. Cartas da skis e scola da skis

1. Per affons che possedan negin abbonament da sesiun e basegnan ina carta dil gi/da miez gi, surprenda la scola la mesadad dils cuosts (vala mo sch'igl abbonament da sesiun vegn buca surprius dalla vischnaunca). Per PI che possedan negin abbonament da sesiun e basegnan ina carta dil gi/da miez gi, surprenda la scola ils cuosts. Las PI che possedan in abbonament da sesiun vegnan indemnisadas suenter la stagiun da skis cun ina pauschala da frs 80.-, sche silmeins 75% dils gis da skis han giu liug.
2. Ils scolarets tochen 6 onns san ir cun skis gratuitamein. Fuss in scolaret pli vegls vala la medema reglementaziun sco per la scola primara.
3. Per scolars dalla scola primara e superiura suprenda la scola la mesadad dils cuosts per lecziuns da scola da skis, denton mo da quellas che la scola ha organisau e tochen maximalmein fr. 300.-/scolar e per sesiun.
4. Dils cuosts dalla scola da skis pils 2 gis instrucziun da skis dalla 1. – 3. classa primara surprendan ils geniturs 30%.
5. La jamna da scola da skis dalla scoletta vegn finanziada cun fr. 60.- ord la finanziaziun speciala (anteriur conto da scoletta). Il rest dils cuosts surprendan ils geniturs.

Art. 23. Ulteriurs cuosts en connex cun ir cun skis/gis da skis

1. Ils cuosts da gentar a caschun dils gis da skis surprenda mintgin sez.
2. Ils cuosts per il gi d'unviern dil scalem superiur, exepiu il gentar e la carta dil gi, surprenda la scola cumpleinamein.

Art. 24. Gi da sport tradiziunal

1. Il daner da partenza surprenda mintgamai il scolar. En quel ei il gentar cun dabeiber cumprius.
2. Mintga participont retscheiva in premi.
3. Ils transports vegnan organisai e finanziaai dalla scola.

Art. 25. Ulteriurs gis da sport

1. Cuosts da transport surprenda per regla la scola. Davart in eventual incasso tiels scolars decida la direcziun da scola.
2. Tier talas occurrenzas duei vegnir grillau ni magliau ord il sacados.
3. Cuosts per premis etc. surprenda la scola cun ina contribuziun max. da fr. 200.- per occurrenza. Ils ulteriurs cuosts ston vegnir cuvretgs ord la cassa da scola ni entras sponsurs.



Art. 26. Cuosts instrucziun da senudar

1. Ils cuosts per l'estrucziun da senudar surprena la scola cumpleinamein (transport, entradas, instrucziun, ...)
2. Personas dil fatg e personas gidontras externas vegnan indemnizadas tenor il reglament „estrucziun da senudar“.

Art. 27. Cuosts auters sports

1. Transports en connex cun occurrenzas ni unitads da sport specialas, las entradas correspondentas e l'affittaziun dils urdeins necessaris surprena per regla la scola. En connex cun la lubientscha decida la direcziun da scola davart ina contribuziun dils scolars.

VI. Disposiziuns finalas

Art. 28. Vigur

1. Quest reglament entra en vigur cun l'approbaziun entras il Cussegl da scola e vala cun l'entschatta digl onn da scola 2016/17.
2. Cun l'entrada en vigur da quest reglament ein las disposiziuns d'auters decrets che stattan en cuntradicziun cun quel abrogadas.

Approbau il reglament entras il Cussegl da scola ils 01-09-2016, revidiu ils 15-04-2021.

La presidenta:

Elisabeth Lorez

Igl actuar:

Gion Casanova